

WAR ZAO !

War zao ! va breudeur, dao eo sevel,
 Ar paour zo dui gant an naon,
 Ar skiant a lar a-vouez-uhel
 'N em ganna start, skei hep tamm aon !
 Skuiz omp aet, re bell omp bet deñved,
 Mevelien gaez, war zao ! war zao !
 Eur bed all gwelloc'h a vo savet
 'Lec'h ma vimp mestr 'lec'h beza sklao.

DISKAN

Deomp d'an emgann diweza
 Holl war zao ! ha warc'hoaz
 E kerzo unanet
 Ar poblou skoaz-ouz-skoaz.

Diou wech.

AR PILHAOUER

Va zad en deus va dimezet
 Gant eur flierius pilhaouer ;
 E Lokeoret ez eo ganet,
 E koumanant Touff-al-Laer.

Foei, foei, foei, va zammik aotrou
 Gant e stoup hag e bilhou.

Tri devez goude va eured
 E oa foar e Landerne,
 Ha va lapous prim dihunet
 A zailh 'mez eus e wele.

Drailha ra eun hanter pater,
 Tana ra e gorn-butun,
 Tapout a ra e grog-pouezer
 Ha yao kuit war hent Sizun.

Pa oa hanter-noz sonet
 En iliz bras ar Fouilhe,
 Me oa intanvez glac'haret
 Va unan 'barz va gwele.

Kavet en doa kamaladed,
 En eur vont da bilhaoua,
 E holl arc'hant en doa foetet
 Ha tamm pilhou 'bet n'en doa.

Pa ya Yannig d'ar pardonioù
 Atao e vez mezo-dall
 Prest e oa da goll e vragou
 E Kastellin an deiz all.

Pa zeuio ar c'hiz er vro-man
 Da dorri an dimeziou,
 Me a yelo en eur gana
 Pell deus potred ar pilhou.

Pa zeuio karrig an Ankou
 D'ober e dro er vro-man,
 Me a gerzo war e roudou
 Hag hen pedo d'her samma.

Komzet vo d'an aotrou person
 Deus ar flierius pilhaouer,
 'Vit ma kano al Liberon
 Hag ouspenn al Lip-e-rer.

FANCH AR PAOTR KRENV

Fanch ar pôtr kreñv hag e vignon
 Oa tont d'ar gêr eus ar pardon.

Tra la la, la la la la la
 La lam tra, tra la, la lam tra.

Digouezet ganto tri aotrou
 Bet o vale war ar mêziou.

Ar re-man zouge leviten,
 Tog kern-uhel war gern o fenn,

Chupenn lost-pig ha bragou berr,
 Gouest d'ober mez d'eur c'hemener.

O moustachou a oa sîret,
 Frizet, troñset ha pomponet.

Hag en o dorn peb a vaz skañv,
 Gasent en-dro en eur gana.

Ha pa weljont an daou bôtr mat
 Ec'h en em lakjont d'o goapaat :

« Les pommes de terre pour les cochons,
 Les épilchures pour les Bretons ! »

« Petra deus c'hoant, eme Fanch kre,
 Da baka 'n tri lakepot-ze ? »

Hag hen mont d'ezo goustadik
 Ha tapa krog en o lost pik.

Gant eun töl dorn war greiz e gein
 E strink uffan war ar bern mein ;

Gant eun töl dorn diwar e fri,
 E stlap eun all e-touez ar pri ;

Gant eun töl troad e-kreiz e ... rer,
 E stlap eun all e-barz ar ster.

« Me zesko d'eoec'h, eme Fanch kre,
 Dont d'ober goap deus ouzin-me. »

Ha neuze Fanch o vont d'ar gêr
 O kana son ar pilhaouer !